



encontro

irmandiño

Cando o poder democrático está definitivamente secuestrado polo poder financeiro, unha nación sen estado coma Galiza precisa máis ca nunca que as forzas políticas propias a defendan. A crise bancaria internacional parcheada con cartos públicos, produciu a crise da economía produtiva cuxa saída non se albisca aínda mentres o capital financeiro ameaza aos estados que o salvaron e imponlles políticas antisociais como as que xa estamos a sufrir.

Nesta situación o Encontro Irmandiño cre que deixar aparcado o proxecto estratéxico da liberación nacional e social de Galiza é mais grave ca nunca. A participación institucional para ser útil esixe levar iniciativas que favorezan avances constantes no proceso de autodeterminación, especialmente cando o PSOE claudica diante do poder financeiro internacional e o Goberno Galego do PP está convertido nunha auténtica brigada de demolición de logros políticos democráticos e nacionais conseguidos ao longo de moitos anos e moitos sacrificios.

O BNG ten que gobernar pero non debe conformarse só con gobernar en institucións que non teñen soberanía dabondo. Ten que recoñecer que estamos na oposición nas institucións autonómicas, e non contemporizar o máis mínimo cun goberno como o do PP que está a demoler o estado do benestar.

Unha forza política nacionalista de esquerda ten que estar máis preto dos sectores sociais que teñen máis claro a identidade nacional e a súa condición de clase, das clases que sofren a agresión económica e a regresión da súa calidade de vida, ten que liderar o proceso de emancipación.

Porque autodeterminación é un proceso que deben liderar os sectores máis dinámicos e conscientes da sociedade galega. O nacionalismo debe achegar recursos para eses procesos e favorecer esas dinámicas.

Para todo iso precisamos unha actuación política máis decidida na sociedade, restablecer as canles cos movementos sociais, coa sociedade civil no sentido “gramsciano” do termo.

Debemos defender a restitución dos millónarios fondos investidos en salvar á banca da quebra económica ou esixir o control público dos mesmos e fronte á bancarización das caixas, temos que defender a súa natureza xenuína como instrumento de financiamento da economía do país e apoio ás políticas económicas do Goberno galego.

Hai que marcar liñas moi claras doutro modelo e doutro sistema de valores.

Neste marco é no que imos realizar a III Asemblea Nacional do Encontro.



III ASEMBLEA NACIONAL DO ENCONTRO IRMANDIÑO

Ábrimos un proceso entre os nosos militantes co obxectivo de repensar e reformular se for preciso a definición e a estrutura do mesmo para converterse nun suxeito político pleno (forza política).

Este proceso ten tamén a pretensión de abrir o Encontro a aqueles nacionalistas de esquerda que se vaian incorporando nas sucesivas fases previstas, resultando no só unha mellor e máis acaída definición e organización do EI, senón tamén un engrosamento das nosas filas.

Fase territorial

Presentacións abertas do EI en distintas localidades para dar a coñecer o punto de partida e os obxectivos do Proceso da 3ª Asemblea. Recolleranse opinións e suxestións e de incorporacións ao proceso.

Fase nacional

Primeira Xornada.

Debate entre os militantes do Encontro e coa participación de novos simpatizantes e interesados. Conclusións sobre:

- Sobre a situación política do País e do nacionalismo. Conclusións.
- Sobre o modelo organizativo. Conclusións organizativas para o novo referente político

Segunda Xornada

Debate de novo aberto a novos simpatizantes e constitución do suxeito político polos que estean integrados no EI dende o remate da primeira xornada.